


16
2762
4



葉忠節公遺稿卷十 詩類

男芳輯錄

賀前輩唐存我周甲科名

唐諱昌世以前辛酉舉於鄉至今上辛酉科

年八十於後起者稱先後同年云

幔亭良夜敞秋雲老竹重棲鸞鳳羣月殿舊春臨晚發
賓筵餘韻隔朝聞從看座主猶時輩便作同年足冠軍
三徑好誇陶處士比來松菊有蘭芬
滄江高卧得閒身回憶鶯遷六十春白髮轉憐簪桂日
元都不記種桃人塵封舊譜聲華寂老見長裙面目新
坐客戲談偕計否公車遲發待蒲輪

贈昭武楊將軍

昭和十七年三月十一日購

大漢通侯裔神唐使相權學書兼學劍能戰即能仙左
右彎弧滿縱橫取陣圓多才方管樂有骨傲洪佺威畧
真難敵雲霄遠待騫問誰堪大將咨爾筦中堅東海風
重表陰符法早傳城看廣武築盟憶汶陽田蟻賊緣塵
合龍驤受命專三軍鳴鼓勝萬戶解衣眠 帝念南垂
重公因北固遷潮生欣得月烽息久銷烟忽報鯨波動
還提虎旅前開營屯細柳被甲上戈船轉鬪千帆駛摧
鋒一將先功成膺異數凱奏扣歸舫峰泖旋生色簪紳
但祝天新涼來碧落朝爽駐嵩年豫有青鸞到遲迎絳
節懸愧無銘勒石圖畫當燕然

曉行

曉角吹星滅蒼然見翠微露光停葉醉山勢趁雲飛清
冷欲衝面烟嵐時薄衣倦遊兼病渴對此已忘機

題畫壽魯使君

新培松菊掩柴關漁浦寒烟隔遠還遙識仁侯心所樂
一窗晴日寫嵩山
山色空濛藹翠屏虬枝百尺敞雲亭桃花莫漫誇春曉
得似春松帶雪青
青接烟霄帝座通劃然一氣豁鴻濛出雲是處分天潤
長在蒼生仰望中
中峰林外響風湍觸石穿雲瀉月寒清絕不須冰雪擬
臣心好作畫圖看

看遍蓮花與岱宗山山靈秀削芙蓉知君泰華層巔立
笑却雲間望九峰

峯迴路轉隔深林花鳥還應僻境尋莫訝松梢無老鶴
鶴飛官閣聽鳴琴

琴在高山流水間清風入指訟堂閒曲中彈出僊人引
瑤島烟波日往還

還思神品李營邱疊嶂層巒一筆收况是山陰多好景
敢揮尺幅擅風流

流傳緘素笑空厨邱壑粗安謝幼輿異日凌烟貌良相
知公類上定何如

如此岡陵上綺筵遠漸米芾早成顛躋堂應笑無春酒
一幅生綃值幾錢

酬陳敬之見贈韻
雲水逍遙足故鄉十年雙膝破繩床自拚江雨岐巾角

獨摘山薇貯錦囊大雅有懷追屈宋小巫終愧逼齊梁
相逢不厭題糕字重對黃花醉夕陽

疊前韻寄陳廣陵仁山巨高兄弟
隴頭幽夢繞江鄉歸拂東廊舊坐床快讀茶經驚綵筆

時廣陵以所著茶賦見示俄拋江賦解青囊仁山巨高讀書通術數如看積玉
遊玄圃却望初珪照畫梁拙宦自甘陶令隱他年送酒

訂重陽
頌制府于公六十韻

皇帝廿一載太歲在壬戌干羽舞兩階玉帛致重驛乾
坤無塵氛明良比琴瑟維 帝眷東南財賦所從出焚
祝開御屏指顧竚良弼曰維于公賢治行稱第一建牙
幾輔時清忠杳無匹 詔書促鋒車宴見入宣室慷慨
陳民瘼當軒語移日初賜千黃金再賜五言律精鏐出
尚方 奎章爛神筆公拜稽首言天恩深到骨寶墨君
所貽投醪臣所急須吏散卒徒受者皆感泣開府控大
江萬里遙呼吸兼領古豫章跨郡二十七銜命方陸辭
含淚復造膝言臣母在殯請歸事私卹追榮及窮泉忠
孝兩無失介馬臨江津移檄告諸率禮賢春風溫逐惡
秋鷹疾謝游解綬歸裴俠升階立驕兵守營門豐狐去
城邑石壕不夜呼官鎧無覆笠下教禁華侈琢雕還我
質漁舟罷網鱗崖嶺停輪密以儉作民先以廉為吏帥
尤念江海衝萑苻伏豪黠按籍誅里魁編門置魚契風
翻鈴閣旗犬卧荒村月乃引父老前登堂示緗帙 制
書十六條牖民誠孔切朝服披瓊函疑義許難詰講解
每終篇情詞細豪髮獲聞仁人言頑懦並心豁大化暢
百城踴躍砥名節百司景高山惴惴懼隕越奉公甘飲
冰遇事思嘔血遂使耕鑿安獄市載寧壹淳風扇古懷
蔚然盛儒術芹藻芬闕宮鐘鼓鏗雅什穆如聞薰絃太
和已翔溢不有濟世才在理安可必公也希聖賢讀書
先名實曲折試盤根百鍊躋顯秩靜閱艱難深動持經

緯密期年風化行敢曰非人傑童叟相歌呼謳吟聲不絕或被絃而歌或磨石爲碣引領盼歲星提壺候車轍熙熙太平時所見各歡悅賤子窮一經性迂因宦拙倦飛投空林揮手謝朝列榮利匪所懷嗜古忘飢渴兀坐黯聲華閉關杜趨謁幸居東海濱取蔭得庭樾暮承花露滋曉汲山泉潔灌園有時間浩歌終一闕輜軒採詩還聊補青史闕願公壽無疆仰副知人哲

頌江蘇巡撫某公六首

漫說東南久太平十年兵後廢春畊憂先秘殿咨民瘼詔許中丞代朕行面上春霜開氣象馬頭人吏斷逢迎聞公笑指長江水不著金焦萬里清

控江到海建高牙鈴閣風清靜不譁舊讀書多諳土俗近傷穀賤飭繁華山塘畫檻誰觴月屬縣公門盡種花雨外一聲牛背笛青郊是處長桑麻

久習朝章百鍊堅欲回霜雪入薰絃鋤筍不設桃生穰刁斗希聞月滿天批答每遲蓮漏下拜章如到玉壺前公卿自古通經術感嘆申韓未足賢

春月娟娟照太湖清光滿目映冰壺不從佐吏登樓飲但給山僧調水符稅減魚鹽平市直漕無鼠雀出官租建康酒號新傳美容得村民盡夜沽

當年執法政從寬判定南山在筆端兩部無冤來澍雨十行秉傳憶雕鞍不妨才子棲郎署幸遇清時作諫官

封事百函都報可直聲早已動長安

引領東巡表大風令先負弩士彎弓平灘熬雪無沙白
曙日翻旗射海紅檄到鱷魚連夜徙劍驅颶母一天空
從容部署當清宴可許詩人不避驄

贈史邑侯十二律

之子能噓谷條風散積陰凍鱗冰罅湧鏤勝鏡前簪清
絕孤梅影幡然百草心望春春始到萬戶聽鳴琴
琴罷行春去倉庚拂曙來析田均舊賦勸墾勞新醅擁
牘花前判敲詩月下回夜來微雨過閣外隱輕雷
雷雨分天潤通津起涸鱗野蠶自成繭戴勝枉催人葉
葉春衣薄星星燧火新回思蘭渚宴少長隔江濱

濱海多磽确恩深土性遷兩岐新麥穗一雨舊桑田漏
箭初迎夏官厨尚禁烟自携日鑄茗文火煮山泉
泉甘休改井土潤好栽秧白扇搖風爽黃梅帶雨香有
官能續命何事感沉湘艾酒家家熟從君盡興嘗
嘗蔗知先尾含冰獨愛清苦心調五味攝息慎三庚電
挾風雷壯鷹期羽翼成北窗涼蔭好解帶卧桃笙
笙簧激清籟樓閣歛輕霞露井飄桐葉秋風開稻花蟬
聲寒更嘒河影望猶斜莫漫誇牛女因誰保室家
家世蘭臺長官閒性愛儒吾鄉先得月大海少遺珠仙
藥兼霜杵天香帶露濡請看荀令座何必換熏爐
爐香薰白袷霜信到芙蓉刀尺憐貧女冰壺慰老農籬

邊菊蕊細雲外鴈行重兄弟登高會年年共九峰

史令兄
宰婁縣

峰隱寒雲裏梅飛早雪中蟻行迴北陸戶瑾任西風夢

憶維魚兆詩歌我稼同焚香報天子上瑞是年豐

豐穰今頻遇天心似獎廉擅爐開社宴履襪貢新縑共

覺堯年永何爭繡線添朝來望雲氣黃紫透重簾

簾垂官閣暮送臈耿餘思歲月公私盡飢寒父母知民

心欣有託帝賚夢何時野老吹豳已因成月令詩

和孔秀才嗒秋自壽四首

學易忘機自寫心風流少府舊衣簪獨醒羞著甘泉賦
通隱休逃苦竹林剩有吟身堪放浪喜無長物歎銷沉
童時手種冰桃核今日看來歲月深

逸興誰勝老大悲閒情無奈寄江籬種花得藥身常健
穴壁藏書世莫知詩許達夫爲後進談傾夷甫作餘思
獨憐小戶難豪飲辜負高陽白接羅

興到臨摹魏晉書能將筆力鬪專諸人懷一紙誇三絕
名逐孤雲騁六虛不慣遠遊安斗室有時行野命巾車
只君已是神仙侶慚愧瀛洲學士魚

江湖是處好垂竿濠上偏知魚水歡當暑調冰澆塊壘
舉杯觴月愛團圞不依大柳徒工鍛自製輕衫待紉蘭
一畝草堂三徑外鳳雛棲滿翠琅玕

九日同人登丹鳳樓燕集二首

曲磴危闌俯市闐暮烟橫處恨無山風前一笛漁舟過

水上三沙鴈陣還各出杖頭消斗酒誰將題目賭雙鬟
餘歡不盡登高會歎惜名樓舊署顏
夕陽秋浦見潮回欲下層樓細雨催戲馬何心爭勝負
題糕無說避譏談晚香容得黃花傲沉醉還疑翠褥陪
禮法豈爲吾輩設良辰都不厭深杯

寓唐亮臣齋因贈

真隱真能傲紱簪自移泉石向城南居然廉讓中間住
莞爾暄涼委曲談霜爲養花驅菊虎香知惜字避書蟬
徧看几榻皆清絕不信偏容俗士驂

輓陳仁山

遙天一鴈度霜風六翮初成墜碧空自欲驂鸞遊島嶼

肯隨軒鶴戀樊籠長沙早世何勞鵬靈寶聞聲恨失雄
今日豈徒悲聚散此生永別半年中

憶君初見未勝衣早慧深藏識者稀一別參商勞想像
十年面目識幾希自推祿命無人及頗笑文章舉世非
天帝愛才宣召急玉樓簫罷鳳隨飛

彌畱忽忽悼恩勤白髮扶床喚不聞買藥手調還暗祝
抱孫泣問欲何云殘英紅墜春前雨孤月黃昏午夜雲
宿草更憐陳仲子二難把臂下新墳

脫屣家園上玉京空帷長斷讀書聲機殘尺錦文難續
詩恨方塘草不生慚愧素車他夜夢悲涼絮酒故人情
魂兮欲慰高堂願默相孤雛及早成

東侯金長真觀察

十載清名護玉函才高望重象巖巖一官雲水看垂組
萬里邊庭剝破衫月夜有懷邀笛步春風虛挂上江帆
多君愛我情如舊五色巴箋自署銜

香風吹下五雲箋字少情多倍黯然花信到來應勿藥
訟堂深處好鳴絃江心鉤月魚驚餌旅夢筵鐘客悟禪
寄問畫簾何日捲似曾相識燕堪憐

贈祠部馬尊乾奉使淮關

萬里征西將家風本伏波還君修禮樂乘傳控江河百
貨籌添舊千帆吏唱過笑他桑孔計無那賈人何
憶昨同遊處秦關絕不堪別來通夢寐書到得心談土
暖花宜好情深水亦甘重逢或天合莫負在江南

恭賦 御書清慎勤署額上兩江于制府

漸海連江萬里涵空明佳氣竟東南畏人知處天堪問
似水心如鏡在函有味中冷推第一自生新月起初三
請看 御筆親題賜一字先教寶不貪

右咏
清字

莫誇棲燕語呢喃玩籍深藏志不凡朽索驚心看六馬
金人有口合三緘白茅是物都堪藉禁樹休誇好避讒
珍重濡毫成二字可知交警在民巖

右咏
慎字

太平日月萬方瞻身作元臣百慮無風雨空齋宜運甃
篝燈中夜每投籤分陰能幾堪虛擲一線憑誰許見添
絕勝玉堂飛白署三言寶墨帶鍼砭

右咏
勤字

寄井陘觀察李梅嶺

七載真成別逢人問起居官閒勤賭墅性懶健看書梅
雨千村足松風兩袖虛西屏山色好欣賞定何如
每憶同官日經過但白衫忘形雖爾我比道已仙凡揮
手忽萬里關情信一函知君懷舊切山亦號蒼巖

井陘有蒼

巖山余別號偶合

自笑經行處寒山石可談叩囊空筆舌善謹愧青藍狂
態長貧減人情久宦諳投林羞幸早侍母在江南
屈指中朝士如君才命兼賜婚年未弱早達性能謙白
雪飛官署青山觸畫簾來詩頗有味莫惜水精鹽

贈江撫王公

諱純嘏

梁州天府國潼川作東扞一峰屹長城三江駛修听名
世鬱相望有堂美輪奐維公挺異姿遂為今古冠我
后知公深遷除迴常算睜然軫東南財賦天下半天風
吹楚雲遠潤吳疆早旌節過大江歌呼喧井閤憶公早
致身翩翩富文翰繙校直西清著述積東觀秋蘭竟體
芬聲華爛霄漢賤子通籍初問奇造几案休沐輒往還
秘書資講貫飄忽廿載餘理得無聚散歲丁癸甲交吳
淟首發難昆明翻狂瀾奉使何所憚以氣折逆臣孤忠
慰宵旰歸筦中樞權咄嗟平禍亂來旬古豫章絲粟躬
校勘了如掌上紋劃如田間畔實兼房杜才開敏善謀
斷建牙黃鵠山激昂恢局幹清節高申徽威名儼陶侃

皇哉 聖主恩賜公活塗炭仰視斗牛間粲兮光華旦
嗟予守一經宦遊成汗漫窮愁歲序徂偃蹇榮名澹吳
下阿蒙耳其誰起焦黷感公舊知己慨然成鄙諺此面
如此心試開青眼看

題張觀察家慶詩卷

宦遊時見白雲飛便脫朝衫疏乞歸母子錦堂同鶴髮
兒孫繞砌總斑衣板輿花木家山看秋水蓴鱸入饌肥
讀罷前賢舊題句慈烏繞樹戀斜暉

方瓢次韻

方縣張處士齋名也

卜築依然君子鄉柴門松菊領羣芳先朝象笏甘棠比
春社烏衣舊壘香家有賜書摹古碣口吟雅調謝詞場
但聞姓氏堪神往目斷蒼葭水一方

桃源有徑曲通橋魏晉真忘秦漢遙灌植久諳風雨信
鷗鳧間趣往來潮龍文奇字容人問鶴踏寒枝遣婢樵
却笑壺中天地小結廬來借許由瓢

欠山詩

欠山張別號也取二水宜家只欠山意

只占虬江水一灣月明時唱棹歌還橘洲悵望無千絹
爭得餘錢去買山

別業幽深水石閒輞川一卷重人間他年若畫江橋宅
只畫溪雲不畫山

東望蓬瀛不可攀九峰烟黛有無間尋思恐被愚公笑
別號從人喚欠山

喬蓼懷五十雙壽

春暖花明愛日遲
杏梁雙燕欲栖時
錦囊寶護傳家硯
翠管吟聯祖德詩
舊畫黛痕青到案
新看鏡髮綠無絲
知君自有千秋業
且醉平分百歲卮

賀陳乾齋及第

上元甲子冬 皇帝東巡狩岱宗
申虞裡河流行禹舊
酒醑鍾山陵秩加孔陵豆為道
屈崇嚴皮弁虔九叩所
過蠲田租每見斥雕鏤 皇仁霑海隅
書契曾未覲回
鑾撫昌期側席思孝秀手緘黃紙
題親乙賢良奏重瞳
日月明一榜羅天宿就中數賢人
帝以賚我 后陳君
天下才落筆紛錦繡經傳公孫弘
書法太史籀鐵心磨
研穿青燈煎骨瘦十年揣摩成一第
宜領袖君家人門
高歷歷簪纓胄勢位非不崇科名更
誰右莫嗟湖海豪
誤落機雲後余也濩落人傖父成學
究重過春明門偶
及鶯花候絲絲宮錦衣冉冉天香透
持此娛雙親喜極
憑添壽人生稽古榮於理非解后時
平方右文睿智且
天授六經懸中天萬象麗清晝置身
雲霄間德言期兩
懋况君富春秋才力空宇宙千里騁
驛驢九天飛鸞鷲
丹地待參知蒼生仰函覆古來繡衮
人委蛇事功就衰
遲幸見親援毫忘鄙陋

寒食次下相

驚心寒食到一望
一潛然短髮看
簪柳荒墳亦掛錢
炊

烟仍不斷蠟燭更誰傳夢逐東風去關情是墓田

宛平王相國招飲城南別墅

相業高深萬象涵近營綠野 帝城南衡連甲第堪攜
具徑繞沙隄好駐驂傑閣去天真尺五曲池如璧可涵
三朝回閣延賓從風月霏微一塵談
坐久涼颺起碧潏滿庭花氣滌煩襟牕間方空遙青動
樹底圓陰積翠深萬軸 賜書先世澤一泓止水大臣
心追陪酒半饒清興更上層樓望遠岑
極目烟霄瞰九關參差宮闕五雲間溪泉隔樹流銀漢
几案當牕列翠鬟即景不須圖北苑此身如已踞西山
曲闌處處都凭遍爽氣蒼然拂醉顏

日轉槐庭晝漏平一簾清影愜幽情龍文喬木皆梁棟
寶色家珍是鼎鐺濛濛會心知不遠蓬壺有路許隨行
自慚俗吏無仙骨憑借風雲足下生

許時菴招同諸子雙林禪院觀荷次韻

勝侶尋幽剎芳筵對水張宿紅窺鏡影高翠捧珠光雨
後人尤愛觴傳我亦狂相看塵土氣俱付碧雲鄉
淨域原無染紅顏不似張幾番香霧雨一片綠雲光敵
手知誰勝吟情問若狂得從玄度飲未暇憶家鄉

次和宋聲求念功昆仲雙林禪院觀荷

東風吹雨過蓮西蠟屐衝泥到虎溪初日映花翻錦浪
曲橋蔭柳接青霓垂竿幾尺魚來餌携榼何人坐繞堤

奕罷酒香催就席碧烟深處有蟬嘶
僧院通融作醉鄉風流敢效謫仙狂貧窺積玉饑能飽
老媿愁蛾畫不長但略形骸如鄴下便無簫鼓亦山塘
輸君一艇衝波去烟水低迷見鴈行

湖光新霽絕纖埃為有芳苓載酒來露宿小苞香未散
風吹淺靨笑全開不辭河朔千杯飲恨少菱歌一棹迴
手把碧筒催速吸倘承仙掌更誰陪

凭檻高吟對夕暉芙蓉新句奪春菲迴颺過水花香細
當暑調冰酒力微共羨紫衣年最少試乘青翰醉方歸
嗟余本是烟波侶悔別家山舊釣磯

天寧寺秋霽

清霜拭太虛顯氣滿庭除埴勢秋雲破燈光夕照餘旅
懷憐燕雁詩韻叶鐘魚蟬怨徒聞嘒螢乾不映書砌聲
移蟋蟀杯影得蟾蜍牕曙蛛仍網苔空蟻復居一看明
月上共訝古槐疎佛火燒金字心香引翠裾風偏穿蒜
押星故落犀梳別有關情處雞鳴酒醒初

酬井陘觀察李梅崖

明河亘天霜滿野旅客孤吟古槐下匹練飛飛落我牀
謫仙詩句米顛寫笑指緘題若不來燈花昨夜何為者
欣然朗誦心目清的才名不可假七言神韻入杳茫
寸墨香痕致瀟灑問我吳興得去無可憐櫪下長嘶馬
中丞絕怪白蘋風笛步肯邀桓叔夏一杵鳴霜破葛衣

五更送燕歸秋社名場自惜類飛蛾世味何曾如食蔗
倦眼思看讀過書天大京城無處借短袖危冠不稱時
游行巷市人驚訝酒闌拂拭雙吳鈎耿耿烟空寒影瀉
相思極望隔滹沱聞道靈泉出官舍芙蓉亭子擬家園
兩岬嬌紅粧不卸曬腹知從北牖眠分朋好向東堂射
今日風流屬使君尋山莫憶臨川謝執筆沉吟欲見難
幾回促命嵇生駕羈愁牢落不堪言四壁啼螿看秋夜

長安憶別十首

有序

廿年京洛萬里邊庭籍轍多窮朔飢欲死念小
子不堪用世無事解嘲乃老母勗以代耕依然
捧檄悵違定省別路雲飛遠荷親知離亭悵飲

當秋感憶坐月孤吟獨夜緘題因風却寄

風力推雲結曉寒絲絲春雨沐紅蘭舊遊烟水孤帆穩
慣客江湖雙眼乾數語寄回慈母聽兩行不作醉人看
世情冷笑懷中檄毛義原來解愛官

是日辭家起程明旦大雨遣僮歸復

老母

雪後隨車又十年行前一刻許流連楫辭龍竹看船尾
檣轉鶯堤憶柳邊桂刺半綸羞後進賣殘二頃愧先賢
遙知暗悔燈窗下鑄就顏淵不值錢

是日沈業師追送舟次一揖而別

追送蘭橈疊鼓催烟堤晚泊看殘梅烏衣畫棟知誰主
白首青松盡此杯蘭契未逢諸謝在竹林同醉阿咸來
銷魂最是彎環月憶別無雙已六回

妻叔張履貞同內兄若木又白連袂

黃禹功舍姪子法飲王氏梅園
若木素不飲是日獨盡一杯

一束行裝寄董帷也題名姓別朱扉綺筵但作將軍客

岐路不逢太守歸水驛烟開移釣艇江村花暖脫棉衣

眼看簾幙東風足自笑孤蓬背燕飛渡浦寓董葦滄齋
昭武將軍嚴席以

待又郡守魯使若訂自江
寧歸語余適詣婁東不值

君因請急暫還鄉迎送津亭共一觴自古冷官惟博士

如今拙宦是中郎貧憐子女遲婚嫁醉數行藏互短長

雙燭淚珠通夜雨心花滴破杜鵑香舍姪芥舟為高淳
廣文請假歸送兩

夜談心
達旦

為訪王郎約共行存亡真見渭陽情泉臺夢斷憐渠妹

血縷恩聯只此甥掩淚歌筵看後漢關心棋局賭全贏

別時白盡君頭髮別後如君髮更生張蓉城余先室張
恭人兄也恭人止

出一女適婁東王氏因同往視夕
演白兔記舟迴對奕竟日故云

重開祖帳試新歌情到汪倫十倍多楊柳小詞空舊雨

牡丹香夢帶春波一牀珠串誰能和兩岸雲裳不忍過

二月山塘好風景酒醒無奈別離何余姻家汪允升數
日前已張筵餞別

是日復餞山塘
舫齋演牡丹亭

人間小宋本風流攜妓尋山作勝遊雙鶴林逋來鄧尉

片雲姑射上羅浮僧留竹院供茶薜屋仿蘭橈載酒甌

絲管夜闌人醉起霏霏香雪滿衣裘是日宋義存招同
鄧別詣子觀梅薄

暮飲山家半
舫水齋故云

吾生心事子能諳欲遣閒愁倚半酣酒底詼諧常累百

年頭瞬息便過三懸竿犢鼻行將曬束易塵牀孰請談
共有高堂垂白母偏余身不在江南

為舍姪硯孫作也
仲春言別今已新

秋故云
犢鼻事

悵望軒楹歎魏舒嘉賓風調近何如雨連春淚悲飄梗
雲對秋空憶倚閣思入飛烟吹夢杳鐘催殘月照窗虛

更憐玄度無慘甚劍裏寒泉可得魚

家母舅吳翁同表
弟洲序餞送洲序

師許聖
思在焉

乙閣詩贈楊給事覺山

長安塵舍填城郭尺壤寸椽不可拓卜宅豈容無樓臺
胸中要自有正壑先生朝回拄笏看北隅一樹當籬落
土僅容根枝出簷縱橫偃屈誰拘縛閒裏經營忽會心
繪圖名匠謀工作諺云借地不借天飛甍峻宇盤空廓
關山宮闕羅目前劍佩圖書欣有託拂席揮毫寫諫書
精誠呼吸通冥漠擊錫嘉名只紀年丁郊橋頭事如昨
君不見官街甲第營千區何似柳梢營乙閣

次某司徒新齋落成詩韵

位置花間八九椽風庭露蕊帶秋妍知公憂國心如醉
拂拭平泉對月眠

公退從容掩碧紗吟酣猶憶虎邱茶莫愁難覓中冷水
一片冰心貯井華

鏡檻簾開四座涼月波衝瓦澹含霜到來已是芝蘭室
况復新詞發古香

結構清嚴遠市喧六街塵不到周軒朝回燕坐繡圖史
却勝温公獨樂園

倒用前韻

屋製依然仿故園迴廊百折拱前軒不須西塞山頭望
南燕爭棲繞棟喧

火宿宣爐小炷香宋元人畫舊烟霜眼看四壁都清絕
月透踈櫺枕簟涼

越瓷承露浸鬢華堪與歐公巧鬪茶秋水註成清沁骨
藥苗香影上牕紗

吟安七字夜忘眠玉茗堂詞失故妍轉覺新齋几席小
難容燕許筆如椽

壽萱歌爲汪太宜人作

關中碑板盛名蹟秦漢晉唐羅一室諸家八體互爭奇
玉澤珠光耀星日就中何碑稱出羣壽萱兩字儼神筆
汪公至性開精誠一見欣然動顏色爲言吾母年八旬
此字休徵契胸臆不徒樹之堪忘憂誰其書者壽金石
寸丹所感開必先昔賢畱以貽有德婆婆手拭蒼苔痕
幽洞龍蛇奮鱗翼千年神物遇知己百幅藤箋蘸香墨
捧書衣綵乘傳歸升堂拜母前造膝不將楚舞侑霞觴
自譜秦聲調錦瑟是時秋月正高清香古馥紛瑤席
猗歟母如鍾郝子曾何奇踪靈貺神所呵青碑綠字光
不磨尋常筆墨安足多

葉忠節公遺稿卷十

一詩類

男芳輯錄

冬十月 乾清門引見二首

鳳曆頒冬朔龍衣捧壽觴九州成萬寶六律肇初陽日
近風猶暖宮深漏覺長星雲將曙色花木小春光鐘動
開魚鑰班分逐鴈行承恩隨啓事伏闕見垂裳穆穆天
容睟巍巍帝道昌燔烟虞典合俎豆孔林香宸翰輝河
嶽薰絃解雪霜巡遊無補助親策舉賢良館局編謨烈
郊壇正樂章文思四表格神武兩階望萬國圖王會三
驅服夜郎吹噓能偃草煦育共扶桑尚德刑期措懲奢
士用臧太平憂水旱明旦儼羹墻心本傳堯舜功何論

夏商淵泉看浩浩乾象仰蒼蒼幸值時方泰應知禮自坊清勤臣子職奉此凜官常

扇開簾捲座當陽引奏欣隨鴛鴦行萬象氣清天一碧四方風動史重光宮花近日先春麗正朔頒時應曆長自愧小臣叨遠馭願抒精白報君王

和丁景呂雪窗二首

諱弘誨江右人獲鹿令

氣壓同雲凍不飄玉塵寒挾北風驕偶移人世為三鳥若擬仙根亦九標孤客自求詞賦敏濃情肯放酒杯清漢唐事往空垂柳詩思何曾在灞橋

雨露當年潤髮膚鹿泉今不歎無襦相看同調皆寒士莫訝空山有餓夫守白但能全白壁選青何必羨青妖多君貽我陽春句前路堅冰亦坦塗

贈真定趙都督

海甸銷兵日河山誓爵年丹青標畫閣鏡吹譜宮懸分陝威名震征西委寄專龍沙屯虎豹狼麤定滇黔勝算常摧敵奇謀在擣堅鸞章褒將畧貂錦賜行邊秬鬯優元老彤盧賜象賢儒衣推袷禮武庫本神仙橫渠詩篇秀臨池筆法妍承恩聞密詔對御拂華箋鳳尾呈書覽麒麟受寵偏一軍皆取號百戰獨當前蜀道霜迎戟文江水濯韉大旗翻滿月寶劍截流泉三輔衝繁地重瞳軫視先使星移益部壁壘肅全燕風捲長淮雪春開細柳烟令公真盛德尚父筦中權欣接平原席兼叨

上客筵磨嵯思片石高勒賀蘭巔

芙蓉亭泉曲

鴈門西來水盈科滔滔直走滹沱河河流東去勢不返
城中安得霑餘波供奉騎驢到鉅鹿人面枯塵若新沐
官閣誅茅鑿小池泉聲一道飛寒玉色清氣冽味且甜
大珠小珠疑織簾相傳廉吏有神異此泉天欲名爲廉
隨源疏淪成巨瀆兩岍芙蓉媚書屋寒光已逼娥影清
綺紋似割鴨頭綠了却公事無他營臨流擬濯滄浪纓
自製江南書畫舫錦袍獨坐遊蓬瀛好景當前許誰說
飛箋召我逢初雪曲堤處處落梅花高閣峩峩覆宮纈
敲冰放棹衝雲堆張燈把酒繁弦催行行火樹天不夜
聲聲爆竹殷其雷冰光燈影共明滅遠笛新歌聞遞闕
當茲佳境只宜詩有此清輝不須月舟回半醉上泉亭
藥闌曲折芸窗青縑綾火剪堆紗字花草烟籠剔墨屏
忽然又度迴廊去手撥烘簾邀我住矮簷親署見山齋
斗室人題讀書處蕭蕭几榻無纖塵焦琴閣帖羅華茵
滄洲滿壁書滿架位置高下如君臣使我胸次一朝豁
並坐銜杯語刺刺此君乃可稱風流吾輩何曾不曠達
後凋偶得丁固松作賦猶傳宋璟風高論極歡忘齷齪
逢迎簿領都雍容主客相看兼四美客不云云主唯唯
眼中之人無要人局外之鬼皆新鬼因知謫仙真神仙
泉亭雪夜非徒然君曾采石看江月我勝山陰訪戴船

雪後同沈建有漢燮登真定隆興寺大悲閣二首
千年崇構接青霓携手同升磬折梯雪霽故疑瀛海濶
雲開忽覺太行低僧徒耳食誇遺像碑板苔痕蝕舊題
指點河山說興廢蒼涼寒日又沉西

感慨隋明浩劫因虛勞傑閣護金身梵音難醒雷塘夢
佛力偏蒙土木塵高棟至今棲燕雀危闌自古俯城闈
煩他千手從頭數誰是生天慧業人

閣為隋開皇年建
明天順重修廣輿
記誤註宋開寶建又閣有
千手觀音故二詩云然

贈趙三公子

平原往事可重論肝胆風流此尚存茂遠自應誇愛弟
季方原不後諸昆緣知名士皆人傑尤喜文材出將門
愧我道途棲屑甚得逢雙壁共琴尊

贈真定太守趙子瑜

名瑾

趙分茅上古諸侯幡蓋君仍控上游貧憶括蒼山水勝
衝當鉅鹿簿書稠八年時雨常無旱萬井春溫不覺秋
今日飲醇揮手去馬頭却望是并州

雪後飲息波亭

寒風凝夕陰微雪衆山曉聯鑣出城西初日懸樹杪一
水澹空明長隄亘天矯崔嵬息波亭勢欲接飛鳥吐納
雲外青控排秋中潦晚霞映層冰隔岸見烟草地迥市
無喧情親客皆好當杯容我酣振策恣幽討口如洪河
懸氣與諸峰杳山水偶褰衷心神遂縹緲况吾賢主人

興寄棲羣表琴清聲不繁賦就梅開早作意挽頽波中
流鼓輕棹頓使狂瀾安稍以潤梁稻獨惜亭四隅碑碣
徒擾擾風流豈無人殘墨堪一掃叙語未及終斜陽在
山少林巒卻望遙空翠猶了了大醉得人扶據鞍忘我
老千家燈火光不覺山城小

宛在軒詩

澄溪宋子出宰臨城三年以來修舉廢墜吏民
安之會歲大饑倣蘇文忠築堤救荒之意即其
治後隙地肖舟製屋屋纔三楹首尾畢具瑣窗
映碧雕闌如畫舫東湖石亭亭不減雪浪西有
牡丹臺紅白數本古木參差如岬凭艦扣舷不
知其爲屋也其尊人御翁先生署其顏曰宛在
軒以視羊祖忻之通梁水齋孫德璉之汎江置
酒風調豈相上下哉余偶過其地澄溪挽留數
日飲而樂之忘其在客爲賦八章

萬里乘風仗此航一篙香水憶橫塘碧紗開處湖山好
暫泊西灣是故鄉
空濛不見錦帆涇况是殘冬密霰零卻賴西風吹得穩
蓬窗已對牡丹亭

大雪初消烟霧清要乘月夜剡溪行解維不用黃頭櫂
船尾曾無打鼓聲

書畫移來貯此中玉簫金管溯春風晚晴好繫垂楊岬

樹裏桅燈萬點紅

回頭揆施欲如何志在澄清擊楫過宦海浮沉憑一葉
急流終不畏風波

江南生長羨漁家簑笠衝風壓浪花此地偶逢新雨足
可能移棹釣魚蝦

十丈長艚踞上流朱闌碧檻看來浮憑他多力渾如鼻
敢說生平善盪舟

門外全無車馬喧青山兩岬不聞猿陸居非屋船非水
只合名為宛在軒

乙丑除夕

今宵恰恰在春前花信先從漏刻傳客裏看人忙到夜
鏡中笑我暗添年同爲游宦逢賢主共見新星換舊天
一醉不堪誇守歲青燈留燄照孤眠

此身無歲不天涯今夕燈前轉憶家料得老親思彩袖
因憐新婦頌椒花弄孫雖有含飴樂遊子難將視膳誇
南望故園千里外太行山下白雲遮

丙寅元旦

時寓臨城

醉裏微聞曉漏催薰香猶撥舊爐灰雖無袷服誇年少
但掃華顛及老來萬國此時隨仗散一鞭深望及春回

謂望梅崖
觀回也

他鄉風日頗晴暖三徑梅花開未開

客中冠珮不朝元徧揖親朋似故園萍梗因風依北道
韭花入饌得南飧偶開倦眼爲游戲欲脫冬衣且負暄

此夕賓筵思壽母遙擎栢酒祝春萱

贈臨城廣文趙懿源

才華卓絕冠羣賢絳帳晨開手一編
篝火談經常達曙生徒莫歷欲忘年
盤炊首宿和羹美句艷芙蓉
映日鮮借問風流誰得似平原時譽舊翩翩

贈廣文孫眉

芳蘭竟體口含馨領袖諸生校六經
雙硯尚分淮水碧一瓊遙接太行青
籠中多採參苓貯帳後能翻樂部聽
今日幸窺孫綽賦相將回首息波亭

贈真定同知焦映漢

字雯濤陝西武功人時攝樂城

暫攝銅章綬組添海棠溪上舊垂簾
風流不賦車鄰什儒雅常懸鄴架籤
經授平津兼筮易姓非叔度亦稱廉
行春巷陌塞帷過共指叅軍羨美髯

贈高邑令劉瑜

字忠菴隨其叔官廣東今遷兩浙益運判官

泚水清漣潤一方訟庭花草入春芳
衣衫常惹薰爐氣笑語猶聞芍醬香
自昔謝家誇玉樹從今潘縣有甘棠
西湖到日堪吟賞畫舫歌聲駐夕陽

漢松

在臨城文廟庭東云是漢時植

一枝西向指斜曛勢欲騫騰徑入雲
風逆霜皮枯墨皴苔緣錯節碧螺紋
得依漢曆誇年代幸免秦封漏斧斤
千尺孤根蟠壁水好憑雨露長龍文

唐槐

在臨城城隍廟大可四圍蠢然一物云是天寶時植

但言天寶已堪哀桃李梧桐盡劫灰此地結根非建始
問誰移植向蓬萊婆娑猶自含生意擁腫都應是散材
無奈里人喬木思青碑勒字號唐槐

留別宋澄溪

余以乙丑十二月二十三日到臨
丙寅正月十一日立春後乃別

飲饌常供數十人一餐能令主人貧火添商陸過殘臈
酒送屠蘇又早春醉裏生平多說盡客中肝膽轉相親
臨岐別淚無慚汗併下沾濡馬足塵

不知別後各何如南北音塵看手書風月我思雪浪石
江湖君羨武昌魚一官清白憐同調千里家園念倚閭
相訂宦成齊解組山塘佳處結茅廬

雪浪石

石在介齋中庭余以其
形似也遂以此名贈之

奇巧青山色玲瓏白石盆定州移到此猶帶太湖痕
也足誇坡老真堪拜米顛介齋看玉立應不讓平泉

丙寅正月九日夢後追悼

是日即張恭
人亡日也

恨隔重泉二十年夢來無跡去翻然霑花紅淚干枝血
落筆青山兩點烟繡像挂時同受歲玉釵緣在合生天
祇存一女呼先母遠嫁何曾到膝前

搔首晴雲又早春當年此日斷芳塵不緣夢汝方思汝
可嘆新人已舊人一語未交空對面五更初覺悔翻身
風吹香影歸何處慙負神傷不似荀

再咏唐槐

偶得蟠根古廟中成陰結實待秋風記年何幸同仙李

入爨偏能傲井桐豕腹枵然誇老大虬枝笑爾不玲瓏
但畱此幹堪鑽燧迸出寒冬一點紅

贈欒城廣文陳垓

鱸堂校訂禿霜毫雪裏紅牙郢曲高食我春盤非首着
飲君雅量勝醇醪手栽桃李花常滿心戀琴尊興轉豪
同是中秋懸六矢可知明月屬吾曹

畱別李梅堦四首

丙寅正月上元
與梅崖聯姻

砥柱存吾道相看德不孤浮沉宜拙宦烟火笑凡夫心
事青燈在談鋒赤幟無十年松水誓管鮑又崔盧

爾我心相照清輝百歲圓生時同月夕文定恰燈筵九

陌千花燭三巡萬管絃他年看子女觴祝兩翁前

我老偏誇少君廉曲諱貧編摹忘櫛髮賒貫愛畱賓每

薄尚書諂都逢丞相嗔可知李太白翻是獨醒人

往來風雪裏情暖不知寒出口難言別回頭且對看春
烟恒嶽遠秋漲漢江寬鱗羽書頻寄惟傳一寸丹

宋澄溪偕諸君餞飲蒼巘祠賦謝二首

醉來輕欲別臨發重分携班馬心馳北離筵日漸西一
聲無故咽雙眼忽然低幸是春初草王孫路不迷
蒼巘祠下別把酒餞蒼巘碩果容誰剝同心合筮成古
情溪水淡世味鮑魚醎無物堪畱別牋詩手署函

將至沙河縣口占

帳飲傾城夾道看酒醒馬上各含酸更愁前路皆如此

別淚如何得再乾

沙河縣感舊

荒城當古驛迎送不知頻赤地三年旱黃雲萬斛塵輪蹄惟過客烟火斷居民舊日偶經此曾逢賢主人城市今初盛炊烟萬井深犬肥羣吠客吏隱自鳴琴社燕營新壘雛鶯忘舊林馬頭斜日在猶照古人心

黃梁祠

若黔若皙了髻郎懷鉛揖讓升書堂或啼或笑誦黃卷皆欲置身登廟廊偶得一官志未遂綠衣墨綬羞卑位長吁終日手書空問何所求唯富貴可憐富貴不易求眼前嗔笑從君侯掃門三月竟誰見追送百里徒汗流捶胸擢筋嘔心血十囊五囊事要結花底秦宮幸見憐閣前宜祿因通謁入門長跪捧衣襟義兒無物將丹心北珠瓔絡裝冠子鈿合蒲桃綴粟金在天為翁作秋鶴在地為翁營鬼窟不愧中書笑拂鬚翻使蛾眉羨無骨明廷一旦宣白麻北門仍許坐南牙公卿伏地曹郎怖印纍綬若鄉黨誇朱雀桁開八駟擁每嗤鄧禹無光寵後房珠玉夜生輝門外金銀氣成汞猶恐人間畱有餘凌軋老生如豎儒口蜜腹刀曰余智人愁鬼瞰何其愚嗟嗟如此讀書不足重今年歌管他年慟不信功名不到頭請看一榻黃梁夢

王公新柳詩

從天摘得斗南星夾植周行儼翠屏千里並霑新雨露
早春時節已含青

千章喬木盡龍文江左聲華奕葉聞更羨名家多玉樹
移來一路有青雲

長楊奏賦早揮毫濯濯烟絲映碧桃想憶上林游宴日
一枝曾染舊宮袍

百頃蓮塘開白蘋秦淮行署委香塵爭如移植龍池種
垂蔭東西南北人

西江桃李舊芳菲玉筍仙班滿絳幃樹木樹人關國計
眼看此樹欲成圍

瓠子宣房厓主憂先生一柱砥中流河平不用千金掃
眼起從他在陌頭

東海于公判浙西訟堂春到草萋萋至今猶自舒青眼
卻仿隋堤作汴堤

九府輸錢饋羽林笑他榆莢與桑椹陶公課地無遺利
待看秋垂萬縷金

幾經盤錯到公卿爲政風流草木榮莫訝霜臺惟種柏
看來疑是亞夫營

沙隄一望鬱蒼蒼絕勝長安萬柳堂分陝政成行入相
中州無樹不甘棠

大梁懷古

賊騎如風捲浪痕千年城郭大河吞路傍沙土埋鷓鴣

地下人家見草根紫陌爭誇新井邑朱門誰是舊王孫
信陵已死侯嬴老何處能忘國士恩

前臨京索後敖倉此地因名古戰場偏有賓游畱翰墨
問誰富貴愛文章兔園失秀山川恨雪苑無春草木荒
寄語鄒枚詞賦客買絲只合繡梁王

深柳堂感賦

堂在道署
之西偏

烟絲如畫裊空除影入芳塘水榭虛雨後風流爭似昔
眼前蕭散不如渠官廚猶說長安米箕斂羞看貨殖書
遙憶故園池畔柳此時愁黛可曾舒

巾箱書卷漸凝塵簿領成堆欲等身批答未除章句習
驅馳頗似利名人江帆風正思歸棹樺燭花開夢老親
已是別離驚改歲那堪梅雨更兼旬

雲葉烟條映綺櫳辛夷花落訟堂空曝餘古畫蒸霉白
掃破蒼苔漬水紅穀賤偏無千日酒雨多只望五更風
已爲俗吏休嫌俗閒課陰晴祝歲豐

歲蕤魚鑰鎖重扉樓上晴光靄翠微但見印硃汙毳服
有誰刀尺剪春衣潛身敢羨蜘蛛隱中飽頻愁鼠雀肥
那得癡兒公事了手持官板送斜暉

雀尾香爐手自熏蠅頭箋牒杳難分丁年蕭颯驚青鬢
子舍迢遙望白雲花事一春忙處過江聲萬里枕邊聞
懸魚已久嫌腥食野鶴空羈鸞鳳羣

閒看潭影繞前墀鼓角沉沉白日遲吳地冰鮮應出水

楚山簌笋軟垂枝故園客到偶行酒殘夢覺來猶咏詩
莫訝逢人多白眼此心原不合時宜

送毛會侯歸浙江

十年學易悟盈虛笑別花封返故廬折簡恥求韓衆藥
嘔心貪著傳玄書問奇屢滿多因酒作客歌闌不羨魚
歸去奚囊何所有一篇游記與詩餘

只今臨水送將歸采采江籬悵落暉此夜曲終誰畫壁
到時春盡恰更衣身能出世真名士論得勞生解息機
一聽越吟愁欲絕那堪雙槳去如飛

棘闈唱和

歲丁卯秋八月汪掌科涵齋馮內翰大木兩先

生銜 命來楚論鄉國之秀以登於朝典鉅禮

隆中外訪蒞中丞以先達重臣董其事方伯廉
使僚佐各循例奉職於內某司儲俗吏分不得
與惟執牘呼名揖士子鱗次入已耳既撤棘中
丞出闈中唱和二十六篇見示且命屬和焉欣
珠玉之當前愧砂礫之在後遜謝不敏爰蠲塵
慮虔綴蕪詞敬獻宗工仰祈郢削

次韻酬丁廉使中秋前三日二首

楚天兵後闢文明鎖院更殘正曉晴自笑當關如趙卒

當關關吏也時幾忘摸索在秦京余以壬子呼名目送

大門執牘故云羣英入聞析心隨百感生同是昔年辛苦地好從雲路

問鵬程

院由大門折而西
進有坊曰雲路

狂瀾既倒待東迴時望因歸肅政臺

唐改御史臺為肅
政臺今指中丞公

也親向穀中傳射法

中丞公作
程文九篇

相將爨下惜琴材

今年
貼卷

甚寬見

紫雲一曲吹霄漢

明皇遊廣寒
宮有紫芝曲

金粟千芝出草

萊試上層樓看夜色五星今已聚三台

次韻中秋夜闈中聽雨二首

悵望良宵興漸闌風簷踈雨隔窗寒催詩幾片雲初合

燒燭三條月一般

唐制舉人試日既暮許燒燭三條故
權德輿戲之曰三條燭盡燒殘舉子

心恐濕霓裳應罷舞若登天柱許同看

唐趙知微有道
術咸通庚申中

秋苦雨知微忽命道童曰可備酒來登天柱
峯玩月及至月明如畫飲罷還舍風雨依然楚江只有

魚龍樂添得秋濤海樣寬

雨過蕭然四壁秋桂輪藏處碧雲浮南朝金粉天波洗

北渚烟嵐帝子愁僚佐共依王令幕肅談何必庾公樓

慚余不與東堂宴

宋王文恭與歐陽文忠同知貢舉有
十五年前門下客最榮今日是東堂

自顧原非管樂儔

次韻中秋雨夜即事

月殿花新發客誰帶雨攀鴛機嫌舊樣

盧氏雜說云宮
錦坊舊匠云花

樣不同且東歸玉鏡失春顏老覺名心淡貧知世路艱應官惟

聽鼓無地可偷閒

幕府開芳讌風和雨氣消恰逢折桂夜不是落花朝香

夢思綿邈清歌韻次寥猶疑玉茗曲新向月中調

是夜
制府

開宴演牡丹亭一折恰
有中秋風雨之句故云

次韻中秋次夜得月

桂殿匱開試晚粧一輪清照補秋光捲簾遙唱雲和曲
對酒羣歌月出章先得自應誇近水有懷初見落空梁
絕無點綴虛明甚永夕塵心覺坐忘

次韻紀異

珊網搜珠集鎖闈紅雲先映省中薇爭傳太乙燃藜杖
共許榮光粲玉扉南齊永明初竟陵王子良較試諸學士天忽黃色照地衆莫能解法曹王融上金天頌徐摛曰此非金天所謂榮光也世祖大悅荆楚自來誇卞壁歐陽每
坐見朱衣只今一望函關紫莫問星輝與月輝

次韻餞月

不放蟾蜍夜蝕殘李白詩蟾蜍蝕圓減前圓處十分寬
衰裛牛斗情難別悵望簾櫳睡未安花影欲隨歸碧落
蟻行忍便過烟巒停杯唱到陽關疊揜袖依聲拍畫闌

次韻喝日

霽色曾無薄霧籠秋陽出海一輪紅幸依幕府開冰鑑
不向君王乞扇工按喝音謂說文傷暑也武王自孟津還及于周見喝人王使工左擁而右扇之
小草當階思得雨晴空吹氣即成虹晚來何處追涼
好別院砧聲落井桐

次韻闡事竣志喜二首

不因底事逐人忙慚愧蘓公古戰場東坡送李方叔詩平生漫說古戰場
過眼終迷應見蕊珠誇入鼓未聽鳴鹿豫傳觴丁年漫
目五色說同時得余以丁酉舉于鄉今已三十年矣辛苦誰能作吏忘引領廣

寒看舞袖香風過處月蒼涼

誰言海日杳難攀李白詩高高至天門海日近可攀戰勝羣雄盡入關

終局輸贏碁黑白嘔心文字血朱殷按殷音烟赤色血深也看磨

淡墨標仙籍榜用淡墨榮書以示如鬼神所為也頓覺天香遍楚山盧藏用詩

桂樹生南海相顧欣然公事了得分休沐片時間芳香隔楚山

次韻雜興四首

楚澤騷人萬古聞夔茅無處問靈氛楚詞索夔茅以筵尊今命靈氛為余

占應知才命難兼兩何似風高占一分山曉樹青含瘴

雨秋高浪白湧江雲悠悠身世真如寄顛顛臺郎閣上

芸白樂天為校書郎賦曰臺有蘭兮閣有芸

簿領閒來早閉門此心直可義軒讀書未遍文誰賞

對酒翻悲口自論難與平陽爭舞袖欲招子美葬詩魂

故人惟有山中月今夜窗前又一痕

汎汎漁舟一葉輕也隨估舶強孤撐江豚吹浪添風力

野鷺沙眠愛日晴冷暑不鋤荒徑草故山遙寄晚香英

洞庭清淺楓林紫嘹唳霜空又雁鳴

詩篇不厭往來頻曾記瀛洲謁後塵細數行藏為善樂

止談風月在官貧指南車已臨周道望北心應上漢津

竊附青雲欣有託敢言趨侍路無因王浚詩奉辭慕華輦侍衛路無因

次韻雨夜降睡十首

一籌初上水四壁正蟲吟霧氣連書幌風聲過竹林倦

偏愁裏甚秋更雨中深燈火梢頭蕊熒然結寸心

有客非莊鳥多才笑景差雌雄風不辨雲雨夢堪疑獨醒誰同調孤吟恐後時挑燈開舊帙無復嘆多岐

家貧無十乘夜靜得三餘自咲蜂鑽紙還憑酒下書揣摩憐季子消渴甚相如莫漫開雞舞蒿萊未剪除

身經諸劫後愁與歲俱長既不因人熱其誰謂我臧齊

揖我謂我臧兮三相思正則諸殿憶靈光秉燭遊何益從今笑

古狂

不寢惟聽雨青燈照卷黃竹應添醉態花偶作啼粧漸覺吳綾暖頗嫌楚簟涼開窗看夜色一幅米元章

擁被無聊甚家山想陸雲爐香凝翠靄詩思薄蒼旻何術祈朝霽相將飲夕曛角殘天欲曙引領望清氛

江上蕭蕭雨偏侵花月期欲遲臨渭宴唐中宗臨渭亭行幸開宴賞菊

故漲影娥池文酒堪千古陰晴任二儀楚天如可問不必弔江湄

明鏡生華髮青雲嘆夙緣口脂如苦蘗杜工部詩口脂面藥承恩澤

心火竟寒烟生計中年失文情一醉蠲只祈今夕雨點滴落公田

涉世思緘口逢人悔徑情斗筭原自小棋局幾曾平吏職將何補微軀不敢呈韋澳十年不調或欲使謂已今薦之澳云恐無呈身御史

宵騎蝶去應與白鷗盟

中流公砥柱涉險衆心凭霜刃新硎發程書舊貫仍人欽雅度九九獻微能吾道推燕許生平得未曾

頌大司馬徐制府五十韻 有序

蓋聞抱松栢之心者亭亭直上涵江海之量者
休休有容一德一心曠古頌明良之盛雙旌雙
節大臣兼文武之才裴行儉君子之師廓清萬
里張忠定仁者之勇圖畫千秋金惟百鍊而彌
堅玉以連城而可寶在昔青編遙集於今紫氣
親瞻伏惟某公石麟頭角威鳳羽儀帝鄉同是
南陽分得乾坤之秀台座近依北斗看如日月
之光生本周正人思冬日心含春德任則秋官
不尚霜威務得情於五聽獨持風力必準法於
三章惟本仁恕以傳家故大門閭於奕葉表東
海而治太公之履泱泱大風登泰山而遊聖人
之門巍巍峻德變齊變魯笑管子非天下之才
克清克明謂曹參乃帝者之佐策勲東土移節
南畿當中原人滿之地租調殷繁值三方蠶起
之時戈船絡繹公則篝燈指畫如意手麾措民
磐石之安過師衽席之上鍾山豈無草木民不
知兵皖城亦有鼠狐吏皆守法維時滇孽雖平
楚江未靖天寒日瘳燐火猶青雨足潮生江流
尚赤天子撫髀而思一个我公叱馭而制兩
湖爰霽崇巖勤咨疾苦念行間之輸金輸粟滑
吏肥囊憫田家之新穀新絲豪民蠶食法以文

深而敝教以兵後而弛政欲觀成道宜善始皦
皦澄潭之月清映冰心熒熒照乘之珠明如水
鑑謂民莠之當刈首黜里魁知伏莽之難消先
嚴保甲以刑弼教爲道崇儒繫律書三千屬之
文於 聖諭十六條之後育楚邦百二城之秀
爲孔門七十子之英馭吏則公而不苛故無飾
喜亦無飾怒敬事則敏而能慎故可顧行亦可
顧言禁網日踈秋到有雀棲之寺蠻烟夜熄月
明無犬吠之村用是期月三年五風十雨亂後
之江山如故域中之景物常新而尤念極負雖
歸瘡痍未起地連七澤田廬久沒桃花賦已
徵村落近增攤稅遂繪圖而請命旋下 詔以
停輸功立一言恩推四海祝宜千祀碑勒萬山
蓋惟耳目心思舉念無非報國故霜霆雨露焚
香俱可告天商鼎待調義年可卜某人門俱下
仕學未優徒讀父書不是經綸之手濫登朝籍
偶爲出納之司惟瞻天上之斗箕不作倉中之
雀鼠回憶西清故步已隔仙凡愁看北渚狂瀾
但悲時命所幸身雖朽木蔭得喬松江夏參軍
近作庾公從事丹陽令史曾爲張令門人每棄
瑕而錄瑜亦解衣而推食魏舒守確獨蒙鍾毓
之知蔣琬沉酣偏荷武侯之賞蓋成身等於生

我知己甚於感恩不揣無文斐然獻頌在昔陸
機入洛作賦以美張華裴度平淮撰碑亦資韓
愈某才謝昔賢心銘厚德慙無國士之報聊效
草蟲之吟敢瀝丹誠敬呈青眼伏祈郢削用正

巴歛

堯歷當初盛周才備後先九苞輝鳳翼一劍淬龍淵雷
電新懸法弓旌慎擇賢惟公爲士日能體好生天五聽
殷頑格三章漢約宣至今稱定國直可配庭堅爰詔西
曹椽來甸東海田按圖巡賜履置府鑄圜錢治尚曹參
靜書從管子傳遂移齊魯俗無異澗瀍年 帝用嘉殊
績卿真合美遷大江財賦地七郡度支權羽騎龔行討
芻糧遠餉邊寸心調緩急萬戶幸安全控制兼三楚威
名動八埏虛懷咨疾苦匠意欲陶甄謂爾荆舒衆猶循
梁晉偏義文輕革面琴瑟在更絃鐵石存孤峭霜稜競
晚妍不私造帳布祇飲卓刀泉晝運空齋甃宵嚴漏刻
蓮溫獻回槁木迅擊甚秋鷗下教除箕歛徵租任手編
里魁狐兔散市虎爪牙卷柳色軍幢接村聲戍鼓連雨
銷千堠火霆掃百蠻烟童叟擎裾舞材官解甲眠昇平
今若此巷陌自恬然乃集衣冠彥重開俎豆筵築廬環
學舍起閣踞山巔廟竟看如陞墻無笑及肩見來皆揖
讓是處有歌筵尤軫兵戈後頰懼水旱愆籍中多耗失
稅外更方圓竭澤憂時切焚香請命專 王居因渙汗

疏入已旋乾流慶沾諸域推恩喜並蠲仁言爲利溥民
瘼應期痊耕鑿資恒產逋逃返舊廛麥禾含秀潤雲物
迴澄鮮朝野尊元老帆幃濟巨川道高宜坐論氣暢協
宮懸賤子羞凡骨公門濫屬員斗筭雖小器桃李亦奇
緣抱犢常咨事從游願執鞭仰窺誠浩浩垂裕故綿綿
竹素標清節葵丹映紫躔勳華推世俗風度儼神仙亭
以申徽建碑同杜預鑿愧無清德頌拜獻 聖明前

葉忠節公遺稿卷十一

葉忠節公遺稿卷十一

男芳輯錄

賦

秋月賦

維月容平暄涼始分地有餘潤天無纖雲萬邦同軌九
重右文於是啓玉堂披絳帳抽靈思發秘藏先生蘊鮑
謝之風弟子陋齊陳之唱於是露井晨吹碧梧飛葉鳳
池夕澄金波如雪顧而樂之命賦秋月辭曰秋氣顥以
次寥兮仰霜空而如拭結璘迴其宵麗兮澄水天而一
色河亘亘兮漸橫波鱗鱗兮如織光始燭乎台軒度不
躔乎箕畢玉露旣零庭柯蒼澁林烟乍收鴛瓦浮碧雀

疑曉而驚棲鴈乘風而鼓翼騰千門之夕輝照萬里之
容隙於是騎曹常侍方鎮賓遊長吟西省高宴南樓或
誚微雲之點綴或賞咏史之清幽珠簾不定桂影常浮
霜珪自滿玉斧徒修衰露而香霑衣袂聞聲而鶴過山
頭笑宋王之悲奚益羨謝莊之賦誰儔至若繡闥綺羅
平陽歌舞寶鏡乍臨晚粧尤嫵碧紗凝烟畫簾楚組簾
捲窗開一輪方午倚瓊簫於鳳皇酌蒲萄於鸚武招姮
娥之下來邀天孫以伴伍爾乃譜霓裳停羯鼓吟影娥
汎銀浦清光裴裒露華髮鬢文蛤之無輝弄夜珠於
江澣若乃萍踪旅客單車戍邊覩江湖之飛鏡望關塞
之孤圓塞羅幃兮淚如雨枕金戈兮夜不眠蛩鳴北戶
鴈去南天刀鏤誰夢生入何年莫不沈吟望遠頰首巡
簷悵王喬吹笳之夜泣劉焜清嘯之前又或思婦樓頭
佳人宮裏當窗自憐中夜數起顧庭草兮含霜步玉階
兮如水杵鳴榆塞之衣賦貴長門之紙團扇委於涼風
并刀落乎纖指人不同圓心隨魄死怨莫怨兮君王悲
莫悲兮蕩子他如幔亭良夜寶婺名都或號玉皇太姥
或稱烟波釣徒開筵巖岫放艇江湖一絃月子數曲漁
歌呼吸通廣寒之殿歛乃溯天漢之波其時寒光四射
清霜淒然游鱗可數巖花夕妍謝朓當庭而恣翫袁朗
援筆而遷延是知風景不殊悲歡理別高會者眉揚向
隅者心結惟我堯天同輝並潔八荒無塵九有有截樂

貞觀於萬年齊太陽以無缺乃歌曰水澄澄兮芙蓉拒
霜風蕭蕭兮黃花晚香月如珪兮升堂臣何幸兮叨末
光賡重華兮旦復旦頌千秋兮壽無疆

詩餘

沁園春

壽許觀察太老夫人調
三月西湖官署稱饒

擁傳循陔路出江南身拜親闈正湖光綠膩平添春色
柳絲青繫不放春歸鳳曆餘三鸞封錫九八座夫人錦
繡圍笙歌起看仙郎萊舞日映斑衣六橋一帶晴暉
笑陟屺瞻雲色養違羨板輿乍迓堂前藹藹霞觴親捧
膝下依依恩與奇逢天畱好景如此風光今古稀春常
駐又枝頭子熟玉洞花飛

天仙子

瓜燈
虔州圍城裏
時在

戰場燐火燒天地雲霾月黑星光翳瓜田老窳製瓜燈
清涼世風光霽玻璃盞內珊瑚麗
休算做金蓮歸第

不過是東陵遊戲開心照破世人情
那裏子那裏青皮一片油花膩
孝昭皇后輓歌詞四章

孤鸞

冰輪俄缺痛鳳去椒塗人歸玉闕搔首蒼天四野坤維
垂絕試看練袞浣服感君王心酸腸結一夜悲風苦雨
落空花似雪况春分漸近千秋節忍辜負今年恰閨
三月想赴瑤池宴跨青鸞先別只今清明到了斷腸天
紙錢飛蝶莫奏房中舊闕聽流鶯聲咽

鎖窗寒

月落鴉啼雲簾低放玉衣晨舉香燈明滅照破愁烟淚
雨惜分飛宮中母儀官家悵失蘋蘩主更曉鐘長樂夜
深銅箭風吹來去無語傷心處是戴勝桑壇星娥華
渚濯龍門外黯澹春光如許憶前年曾哭長孫昭陵隧
道今伴侶料皇英不戀椒房故翠旗雲輅

彩雲歸

從看苜菜六宮春賁黃封虎紐龍文更雀釵瓊珮同時
授剛半載御墨猶新那知道桂宮蘭殿便玻璃綵雲此
後寢園時薦誰採溪蘋聲吞病中翠帷聽雞鳴尚警
芳晨十篇女則編就檢點鏤篋空存早起時慈寧問寢
眼見是少何人親闈近忍淚承歡暗拭啼痕

洞仙歌

珠襦玉匣忽塵封雲杳秘殿無人但芳草兩宮中說到
佳婦生前同一哭月暗風淒漏悄一聲鐘動後萬戶
悲涼都是宮人泣春曉記取舊時恩越樣傷心誰待看
柳顰花笑只指望仙裾再生來與天子千秋萬年偕老

高山流水

咏莊天申西堂

輕風小燕觸紅窗說家園老樹新香天際越吟聲悠然
占盡春光湖山畔弱柳修篁琴書外別有棊枰畫片藥
裏著囊趁桃花水漲呼酒學流觴西堂如今有佳句
應不似夢裏池塘得意處花看欲笑鳥聽知狂借彈絲
譜入宮商莫相忘你且停尊話舊帶醉思量有誰人載
愁驅馬度伊涼

虞美人

晚晴

枝頭鳩喚詩催酒氣爽晡時後片雲舒卷任東風幾處
殘紅新綠夕陽中桃花春漲堪幽賞回照波光漾樓
前乍見萬山晴都是連朝雨點洗來青

雙調望江南

春夜雨

東風峭浙瀝響空階牕紙似人彈欲破枕函如語聽尤
哀腸斷是天涯愁無寐早起望亭臺顆顆明珠垂柳
線盈盈紅淚閣桃腮芳徑長蒼苔

齊天樂

戊午暮春宋牧仲偕諸同人遊祖氏園亭各賦齊天
樂一闋見示余不及與因憶丙午舊游依調酬和

夕陽催散遊人屨都歸咏齊天樂入破無痕開絨似畫
寫出南塘谿壑撫今憶昨歎沁水荒涼朝川零落如此

池臺一番花信好酬酢 年時携朋燕賞曾臨風藉草
共翻紅藥舊夢猶香新花不見回首春愁漠漠後期早
約引前度劉郎旗亭重酌試聽雙鬟好詩誰唱著

一痕沙 題蘆鴈圖

一幅錦書誰作夜半天風吹落歸計莫蹉跎好嚼蘆
噤噤叫殘霜月个个踏深沙雪畫裏也淒涼况瀟湘

瑶花慢 雨中白丁香

冰姿雪膩軟鞦韆枝頭似春酣思睡馬嵬香粉真色潤猶
帶當年珠淚天然風韻著些小愁容尤媚想漢宮白鳳
纖纖飛上玉釵如綴 分明四出瓊英在葉底凝華清
映新翠隋家剪綵剪不到如許琪花瑶穗澹粧自好經
洗盡羣芳穠麗便喚他三月輕梅與我雨中相對

桂枝香

同人讌集孫北海公郎茂叔退谷園紫藤
花下各賦桂枝香詞余不及與因遙和之

園名退谷憶獨樂午橋風流堪續看過三春桃杏紫藤
開足石家錦綉繁華處問何如天然花屋交枝紅顫軟
梢綠鞦韆一庭芳馥 羨君輩周旋茂叔有繡幕當頭霞
光娛目良夜清尊譜出開元新曲慚余未到東山麓但
沉吟謝傅絲竹捲簾凝望燕掠香來破人塵俗

離亭燕

送計子山南歸

旅况好消詩酒歸興無端倏到得故園翻似客枉折
薊門楊柳梅雨落花風豈是遠行時候 燕宿畫梁依
舊月浸碧階如畫慙愧石尤畱不住班馬一嘶分手雲

樹隔江東鎮日看君蝌蚪

潘陸奇文天馥虞褚健毫花簇郡國鶴書爭勸駕偏是
長卿歸速一笑謝鴻都獨愛草廬松菊 灼灼海榴開
足滴滴檀槽初熟脫帽披巾看溲澱洗盡緇塵千斛菱
葉藕花紅被底鴛鴦新浴

滿庭芳 答馬王坡

小院春歸故鄉人到六年溪嶺飄零提携詩卷到處有
逢迎趁我朝衣乍典頗堪賞酒綠燈青斜陽外輕雷急
雨洗出晚天清 涼生風過處爐烟篆細樹杪雲平正
捲波行罰刻燭催成佳客掉頭竟去長筵撤月冷空庭
沉吟久新知白首飛絮落花情

鶯啼序

對趙青山填送硯孫姪南歸

同遊幾時忍便舍冰廳硯席斜陽裏匹馬空囊匆匆別
我南陌各聽說一聲珍重長堤路轉垂楊隔恨粘天芳
草離亭近處尤碧 冒暑同來冒暑獨去恰經年作客
荆山璞泣血難明黃金用盡無色更無端雲翻雨覆拋
幾度花晨月夕夜窗虛淚眼相看不堪重憶 伊家癡
叔未辨尋常菽粟耽孤寂頗自喜阿咸花底詩酒情濃
幼度階前芝蘭香衰余懷渺渺君名籍籍比來所事成
關切宵須臾任伊東西適可奈千里家園白髮倚閭欲
畱怎便畱得 只今此去撲面炎風又火雲燒石烟村
外梅林蓮渚一種酸心一種苦心刺人胸臆君還記取

江南叢桂天香和露當秋滴好隨風入月連枝折便須
簪到長安相視婆婆娑笑浮大白

春風孃娜

送母舅南歸

爲伊家宅相三度遊燕芳草路暮春天幾晨昏驢背曉
風殘月一程安穩八口團圓髀肉初生髻塵剛退鄉夢
悠然落枕邊教住只貪遲半晌臨歧又惜路三千辛
苦荒雞野店流金爍石黃梅過纜上江船青蒲岬綠秧
田候門稚子錦袖新妍手植山花別來無恙早潮海味
到日尤鮮飄零剩我望白雲親舍渭陽情重好仗周旋

摸魚兒

題桃花源圖

遍青山桃花千樹仙乎身在何處水窮林際人家近雞
犬田園無數行且住一樣有白頭翁媪携兒女喁嘿細
語說記得當年避秦來此春色未曾暮只今看洞口
斜陽古渡分明谿壑如故漁郎重到迷烟霧慙愧晉人
風度披畫譜須知道山間流水花間路丹青不誤但添
箇扁舟東風正好雙槳盪波去

金菊對芙蓉

九月十七日賞菊

風折疎籬雨荒叢菊重陽節物全非更心旌南北馬首
東西悲秋老矣還添恨恨一路水漲天低些兒晴霽遠
山仍翠霜月如珪 僥倖未過花時得晚香數種瘦影
參差恰白衣人對綠酒盈卮但斟但飲思彭澤且莫問
花酒愆期惺惺良友深深良夜一醉題詩

萬年歡

賀前輩唐存我周甲科名

百卉秋零只貞松歲寒偏耐冰雪試看黃初耆舊古風
颺發豫折雲霄桂子比五柳門前奇絕逢辛酉金粟重
開餘芬香泚清骨 雖然世情久歇那霓裳曲部仙響
無別瘦鶴孤鸞不減魏晉人物漫認同年小友便老輩
也須結襪思今昔六十年來兩朝花一天月

醉花陰

方塘曲曲圍葭菼正清波激灩激水起游鱗繡尾紅鯉
可是丹砂染 醉來閒倚亭前檻把詩腸重檢舊事觸
新愁又被離騷着人心坎

葉忠節公遺稿卷十二

終

先忠節公遺稿十二卷一刻於家中一刻於廣州署內
其在家者板已散失漫漶即廣州所刻因家孟公事倥
惚託友人較訂每多魯魚帝虎之譌且缺目錄今春芳
重加校勘盥手繕寫又益以游秦日記一冊謹付剞劂
行世伏乞當代宗匠先生賜閱錫以弁言不特使先君
大節益以彪炳天壤而文章千古事亦藉以傳不朽也
乾隆十年九月朔日男芳百拜謹識

The right page contains vertical columns of text, which are extremely faint and difficult to read. The text is arranged in approximately 12 columns, with a narrow margin on the right side.

The left page is blank, showing signs of aging and discoloration, with a faint horizontal line near the top and bottom edges.

